

Weckherlin, Georg Rodolf: Venus an das Frawen Zimmer (1641)

1 Prin cessin/ gleichloß an gestalt/
2 Vermehrend meines Sohns gewalt/
3 Jhr deren haar/ stirn vnd augbrawen
4 (darunder himmelische blick
5 Entdöcken aller hertzen glick)
6 Wie Triumfbogen anzuschawen.

7 Jhr/ deren schönheit/ ehr vnd zucht
8 Ist nu mein trost/ schutz vnd zuflucht
9 (weil niemand Euch kan widerstreben)
10 Zu Euch kom ich mit meinem Sohn/
11 Euch vnsern Apfel/ Scepter/ Cron
12 Vnd Schönheit selbs zu vbergeben.

13 Dan ja ein jede vnder euch/
14 So götlich schön/ so weiß/ so reich/
15 Den güldin Apfel kan begehrten:
16 Ich/ Juno vnd Pallas zu mahl
17 Schamroht ab dem streit vnsrer wahl
18 Euch alle nu mehr billich ehren.

19 Darumb jhr Nymfen keusch vnd rein/
20 Jhr deren hertz-leuchtender schein
21 Kan alle hertzen bald entträuben/
22 Vermehret mein vnd ewer lob/
23 Vnd fahret fort mit süsser prob
24 Keusch vnd beständiglich zu lieben.

25 Jhr/ deren augen klarer preiß
26 Den sehlen pfleget jhre speyß
27 Mit lieb zu nemen vnd zu geben/
28 Verkündet/ daß das gröste layd
29 Verkehret sich durch lieb in frayd

30 Vnd das recht lieben ist recht leben.

31 Jhr/ deren hertzen noch gantz frey

32 Mit vnversprochner freyer trew

33 Sich hin vnd widerfliegend vben;

34 Wisset daß alle frewd vmbsunst/

35 Wa man nicht hat der Liebe gunst/

36 Vnd das wol leben ist wol lieben.

(Textopus: Venus an das Frawen Zimmer. Abgerufen am 23.01.2026 von <https://www.textopus.de/poems/19008>)